

Nunatsinni isumaginninnikkut ajornartorsiuteqartut pillugit siunnersuisoqatigiinnik pilersitsisoqarnissaa pillugu Naalakkersuisut sulissuteqaqqullugit Inatsisartut aalajangernissaannik siunnersuut.

(ATASSUT-ip Inatsisartuni ilaasortaaitai: Finn Karlsen, Siverth K. Heilmann, Knud Kristiansen)

Akissuteqaat

(Isumaginninnermut Naalakkersuisoq)

Siullermeerneqarnera.

Naalakkersuisut isumaqatigaat, innuttaasut isumaginninnikkut ajornartorsiuteqartut ullumikkut amerlavallaartut, taakkuninngalu tamakkiisumik takunninnissarput amigartoq. Taamaattumik Naalakkersuisut ATASSUT assigalugu innuttaasut isumaginninnikkut ajornartorsiuteqartut atugaasa pitsanngorsarneqarnissaat isiginiartorujussuaat.

Taamaattumik ATASSUT-ip siunnersuutaa Naalakkersuisut iluaraat, taamaattorli aalajangersimapput inuttut atukkatigut kingornuttakkat unitsinneqarnissaat pillugu meeqqanut tunngasuni sullissivimmik siunnersuisoqatigiinnilluunniit pilersitsisoqarnissaa salliutikkumallugu.

Pissutsit meeqqat atugaat sullisiviup isumagissavaa meeqqallu sinnerlugit sulissutiginiassallugit, ilisimasani katersissalluni, Naalakkersuisut siunnersortassallugit meerartatta atugaasa isiginiarneqarnissaat siunertaralugu. Taamaattumik sullissiveqarnikkut ilaqtariit atugaat aamma attorneqartassapput. Suli at MIPI-mit isumagineqareerput. Taamaattumik MIPI'p aaqquissuussinnermut ilaatinneqarnissaa pingaaruteqarpoq, taamaalillutik landskarsimi aningaasat atorluarneqassapput.

Sullissivimmut naammagittaalliortarfik nakkutilliinerlu ilanngullugit inissinneqassanersut eqqarsaatigisariaqarput.

Apeqqutit tamakku akissutissarsiniarlugit nassuiaasiortoqarnissaanik aallartitsiniassaanga, tamatuma aalajangersimasumik siunnersuusiornissaa siunertaralugu. Nassuiaat taanna 2010-mi piareersimassaaq. Meeqqat inuusuttullu sullinneqarnerannut Naalakkersuisut ataatsimoortumik periusissaliornerannut suli at taassuma ilaatinneqarnissaa siunertaavoq.

Meeqqat atugaannaviannik samminnittumik sullissiveqartariaqarneranik Naalakkersuisut isumaqarnerannut peqqutaavoq, isumaginninnikkut meeqqat ajornartorsiuteqartut sullinneratigut suliassaqarfimmi immikkut ilisimasat pilersinneqarsinnaammata. Ilisimalikkatigut piginnaasat allanngueqataasinnaanermut pingaaruteqarluinnartut, malitsigisaanillu isumaginninnikkut ajornartorsiuteqartunik ikilisaqaataasinnaasut.

Siumup siunnersuutigaa meeqqat ilaqtariillu pillugit siunnersuisoqatigiinnik pilersitsisoqassasoq, Demokraatillu meeqqat ombudsmandianik pilersitsisoqarnissaa kissaatigalugu. Taamaalilluni meeqqanut tunngassutilinnik sullissiveqarnissaa politikikkut tapersorneqarluarpoq. Naak ATASSUT'ip nalinginnaasumik isumaginninnermi ajornartorsiuteqartut pillugit siunnersuisoqatigiinnik pilersitsisoqarnissaanik

kissaateqaraluartoq, neriuppunga meeqqanut inuusuttunullu sullissivimmik pilersitsisoqarnissaanik tapersersuissasoq.

2010-mut Aningaasanut Inatsisissatut siunnersuummi meeqqanut tunngasuni immikkut suliniarnissamat 25 mio. kr.-it immikkoortinneqarput. Aningaasat taakku ilaat suliniutinut ilaqutariinnut atugarissaannginnerusunut aamma tunngasunut atorneqassapput, taamaalillunilu ajornartorsiuteqartut atugaannik aamma pitsanngorsaaqataaffiussallutik.

Isumaginninnikkut ajornartorsiuteqartut atugaasa nalinginnaasumik pitsanngorsarneqarnissaannut tunngatillugu akileraartarnermut atugarissaarnermullu ataatsimiititaliarsuup akileraartarnermut ineqarnikkullu tunniuttakkat misissoqqissaarniarpai.

Misissueqqissaarnerit pingaartumik aningaasarliortunik atugarissaarnerulersitsinissaq aningaasaqarnikkullu atugarissaarnerulersitsinissaq siunertaralugu allannguutissatut allannguinnissamullu kaammattuuteqarfiussapput/siunnersuuteqarfiussapput.

Tamatuma saniatigut Isumaginninnermut Naalakkersuisoqarfik nunatsinni piitsuussutsimik taaguisarnerup misissorneqarnissaa suliarileruttorpaa.

Suliamut tassunga aallaaviuvoq piitsuussutsimik siammasissumik taaguusiinissaq, aningaasaqarnikkut piitsuussutsimuinnaq tunnganngitsumik, aammali innuttaasut peqqinnissakkut sullinneqarsinnaanerannut, ilinniartitaanerannut, aningaasarliornermi ajalusoqqajaanermut, inoqatinit avissaarsimanermut il.il. eqqugaasinnaanerannut tunngasumik.

Taamaalilluni akileraartarnermut atugarissaarnermullu ataatsimiititaliarsuup suliniarneratigut tamakkiisumik takunnissinnaaneremut ATASSUT-ip ujartugaanut ikiorsiisoqassaaq.

Siuliani taaneqartut tunngavigalugit taamaattumik Naalakkersuisut kaammattuutigaat siunnersuut akuerineqassanngitsoq.